



Inatsisartuni ilaasortaq, Malik Berthelsen, Siumut

Qaqortup eqqaani mittarfiliornissaq pillugu § 37 naapertorlugu apeqquteqaammut akissut

Aallarniutigalugu Inatsisartuni ilaasortaq Malik Berthelsen Qaqortup eqqaani mittarfiliornissaq pillugu apeqquteqarnerani qutsaviginiarpara.

Mittarfinnik sanaartorneq pillugu Inatsisartut inatsisaat nr. 4, 12. juni 1995-imeersoq tunngavigalugu taamanikkut Naalakkersuisuusut Upernavimmi, Qaarsuni, Aasianni, Sisimiuni, Maniitsumi, Paamiuni Qaqortumilu mittarfiliornissamut piginnaatinneqarput. Inatsisartut inatsisaat taanna mittarfinnik sanaartorneq pillugu Inatsisartut inatsisaata allanngortinneqarnera pillugu Inatsisartut inatsisaata nr. 4-p, 6. juni 1997-imeersup akuerineqarneratigut allanngortinneqarpoq. Allannguinerup kingunerisaanik Qaqortoq illoqarfinnut inatsimmi matuma siuliani taaneqartunut ilaajunnaarpoq.

Assartuussineq pillugu Isumalioqatigiissitap isumaliutissiissutaani allassimavoq, Qaqortup eqqaani mittarfiliornissaq inuiaqatigiit aningaasaqarnerat eqqarsaatigalugu aningaasaliiffigisassatut imminut akilersinnaasoq. Isumaliutissiissut Inatsisartuni 17. oktober 2011-mi suliarineqarpoq. Inatsisartuni suliarinnineq tunngavigalugu isumaliutissiissummi inassuteqaatit suliarineqarneri Naalakkersuisut ingerlateqqinniarpaat. Tamatumani ilaatigut Qaqortup eqqaani mittarfiliornissamut misissueqqaarnerit ilaapput. Misissueqqaarnernut taakkununga maannamut timmisartumiit assilisat, tikittartut aallartartullu akulikissusissaannut misissuinerit silamillu misissuinerit ilaatinneqarput. Misissueqqaarnerit ataqatigiissaarneqarnerat suliarineqarnerallu Mittarfeqarfinnit isumagineqarpoq.

Qaqortup eqqaani mittarfiliornissamut misissueqqaarnerit 2012-imi ingerlaqqissinnaanissaannut Naalakkersuisut aningaasanut inatsisissatut siunnersuutaanni aningaasanik immikkoortitsisoqarpoq.

Inussiarnersumik inuulluaqqusillunga

Jens B. Frederiksen

14. november 2011
Sagsnr. 2011-057429
Dok. Nr. 763855

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl